

## POZIVNO PISMO

Poštovani sugrađani,

Misija gradova pod nazivom „Net Zero Cities“ je veliki projekat Evropske unije koji okuplja 100 gradova Evrope sa ciljem ostvarenja nulte emisije CO<sub>2</sub> do 2030. godine. Grad Sarajevo, Kanton Sarajevo i Grad Istočno Sarajevo su zajedno aplicirali za učešće i uz podršku Delegacije Evropske unije u Bosni i Hercegovini uspjeli smo izboriti svoje mjesto u ovoj veoma bitnoj misiji.

Prostor koji je obuhvaćen misijom čine opštine u sastavu Grada Sarajevo i ostale opštine Kantona Sarajevo te opštine u sastavu Grada Istočno Sarajevo.

Upravo je ovo područje koje trpi najveća zagađenja zraka i emisije CO<sub>2</sub> u BiH i kao takvo će biti obuhvaćeno mjerama podrške i pomoći Delegacije Evropske unije u realizaciji pojedinačnih projekata, a sve sa ciljem smanjenja zagađenja, smanjenja emisije CO<sub>2</sub> kao i zaštite životne sredine.

Misija se trenutno nalazi u fazi izrade strateških dokumenata, identifikovanju problema i analizi ciljeva koji se žele postići u višegodišnjem procesu u kojem želimo da učestvuju i naši građani.

S tim u vezi pozivamo vas da učestvujete u forumu misije „NET Zero Cities“ na temu klimatskih promjena. Pomozite nam da nađemo odgovor na pitanje „Kako je moguće na pravedan način smanjiti zagađenje na obuhvaćenom području i kako ostvariti klimatsku neutralnost?“ Na forumu će biti okupljeno 75 nasumično odabranih građana i održat će se tokom tri vikenda u maju i junu 2025. godine, ukupno sedam i po dana.

Vi ste dobili jedno od samo 4.000 pozivnih pisama koja su poslana na nasumično odabrane adrese s područja koje obuhvata misija. Pismo vam omogućuje da se prijavite za učešće, a konačni učesnici će biti izabrani metodom slučajnog uzorka kako bi što bolje odrazili demografsku strukturu obuhvaćenog područja. Svi izabrani građani koji budu učestvovali na svim događajima dobit će novčanu naknadu u iznosu od 590,00 KM.

Za učešće u ovom forumu nije potrebno imati stručno znanje o temi klimatskih promjena. O tome će vas stručnjaci sve naučiti. Ono što je ključno jeste da redovno prisustvujete događajima kako bismo svi zajedno doprinosili kvalitetnim diskusijama i pronalaženju rješenja za izazove koje nam klimatske promjene donose. Vaše prisustvo i doprinos su ključni za uspjeh ovog procesa. Svačije mišljenje se cijeni.

Pozivamo vas da postanete dio ovog veoma značajnog trenutka, vaš glas će pomoći u oblikovanju rješenja za klimatske promjene, koje će imati utjecaj na sve nas, kao i na buduće generacije.

Molimo vas da potvrdite svoje učešće najkasnije do datuma navedenog u uputstvima u prilogu ovog pisma. Ako imate bilo kakvih pitanja ili posebne zahtjeve, slobodno nas kontaktirajte putem brojeva telefona ili e-mail adresa koje ćete, također, pronaći u prilogu ovog pisma.

Grad Sarajevo, Kanton Sarajevo i Grad Istočno Sarajevo, uz stručnu i finansijsku podršku Delegacije Evropske unije u Bosni i Hercegovini, organizuju ovaj inovativni proces.

Ovo je vrsta inovativnog deliberativnog procesa koji se koristi u svijetu, kroz koji se građani direktno uključuju u proces donošenja odluka putem davanja preporuka. Cilj ovog foruma je da se omogući građanima obuhvaćenog područja da oblikuju smjernice koje će nas učiniti predvodnikom u borbi protiv klimatskih promjena. Radujemo se prijedlozima koji će proizaći iz ovog foruma, kao i njihovoj integraciji u desetogodišnji akcioni plan Misije "Net Zero Cities".

S poštovanjem,

Gradonačelnik Grada Sarajeva

Predrag Puharić



Broj: 01/13-49-2158/25

SARAJEVO, 26.3.2025.

Premijer Kantona Sarajevo

Nihad Uk

Broj: 02/01-45-10053/25

SARAJEVO, 26.3.2025.